

## Aberri-Eguna

*Alderdi.*

Gure aberriak preso igaro bearko du aurtengo bere eguna.

Aurtengo Aberri-Eguna, joan diran azkenengo beste ogei ta bederatzi Aberri-Egun bezela, bere askatasun egarria asetu gabe igaro bearko du.

Ala ere, aurtengo Aberri-Egun onek bere Berpizkunde antzi au oñazez eta nekean igaro bear ba du ere, ba du orain dala ogei ta bederatzi urte palta zitzaion arnas berri bat. Orduan eriotzak eta nekeak oztu zion arnas beroa biriketara eltzen asia da berriz eta berriz pixteko zorian dauka.

\* \* \*

Aberri-Eguna dala, ta, Aberria zer da?

Aberria zer dan sentitzea erreza da; aberria zer dan erakustea, ezplikatzea, ez.

Bañan sentitzen dan aberria da egitazkoa; ezplikazioeki etortzen diran aberriak ez dira egitazko aberriak.

Egia esan, guri ez digute gure aberria zer dan asko ezplikatuz; ta gure errian bizi diran gure gazte berriak ere ez dute bere Aberriaren ezplikazio aundirik artu. Ta ala ere, aiek eta guk ezplikazio gabeko aberria daukagu guretzat.

Guk eta aiek ere artu giñuan eta dituzten ezplikazioak beste aberri batenak izan dira: Los Reyes Católicos, Isabel y Fernando, Castilla forjó la unidad, España tiene una religión y una lengua; todos los españoles tienen iguales derechos ante la ley... Eta abar eta abar. Au izan da guri eman nai izandu diguten Aberria, au izan da ezplikazio bidez guri ta gure ondorengoei ere etorri zaioten Aberria.

Ta ala ere, ezplikazio diguten aberri au guretzat zimaurrek baño geiago ez digu balio, ez baitegu sentitzen.

Eta zer aberri sentitzen degu euskotarrok?

Gure Aberria?...

Ara, auxe da gure aberria:

"Ama!"... ori gure aberria da. "Au miña!", au ere bai. "Lagundu nazazu, Jaungoikoa"... au ere gure aberria da.

Izkuntza, ta berarekin bat eginda datozen goxo-min-itxaropen-bildurrak aberria dira.

\* \* \*

Belkoain mendia aberria da neretzat, nere sorterrikoa da ta. Ta Gorbea mendia urruti egon arren, nere aberria da; mendi orretan il zan nere lengusu bat gudari bezela ta. Ta Sollube mendia nere aberria da, bertan il ziran nere erriko asko ta.

Nere erriko lurra ta bertan gertatutakoak nere aberria dira.

\* \* \*

Ta nere aberria dira Euskal-Erriko ibaiak eta txapela ta bertsolariak eta akulluba ta eliz torrea ta aureskua.

Guekin eta gurekoekin jaio diran giza-bide, jantzi, abestiak eta dantzak gure aberri baitira.

\* \* \*

Ta gure aberri dira gurasoak, noski, ta aitonak, noski; ta, noski, baita gure semeak ere, ta baita gero, gure atzetik etorriko diran beste gañerako billoba ta ondorengoak ere.

Gu gatozen odola eta ondoren datorrena bat baitira, ta erri baitira, noski.

\* \* \*

Zergatik diran gure Aberri? Gureak baitira, gure erriko baitira, gure izate berbera baita!

\* \* \*

Gure izkuntza sentitu edo errespetatzen ez duana, gure neke ta goxo ta izate-lanak sentitzen ez dituana, gure mendiak bost! ajola zaizkana, gure erri-nekaldiaren gurutzea nolabait bere bizkarrean ez daramakiana, gure xinismen, jantzi ta ametz, eta oitura, ta abesti, ta erri-jakintza, ta siniskeriak eta dantzak, eta sendia sentitzen ez dituana ez da gure anaia ez da gure aberkidea.

Besteren batekoa izango da, ta on degiola, ta zoriontzu izan dedilla; ez da gure erritasuna iñoren aurkakoa ta. Bañan ez da guretakoia, ta ez digu bere erri-izate-abestieliza ta giza-bide-izkuntzarik gure bezela sartuko.

Ezplikazio aundiak emango dizkigu; bañan ezplikazio Aberri ori ez da gurea; ori sasi-aberria da.

Gure aberria oraindik ezagun-ezaguna degu; ez digute nola nai aldatuko.

Gure Aberria Euskal-Erria, Euzkadi da.

Ta au da guk gaurko Berpizkunde igande onetan ospatzen deguna.

Au da gure Aberri-Eguna!